

**Govor predsjedavajućeg Komisije za ostvarivanje ravnopravnosti spolova  
Predstavničkog doma Parlamentarne skupštine Bosne i Hercegovine  
Mir sada Isakovića na tematskoj sjednici Komisije za ostvarivanje  
ravnopravnosti spolova „Učešće žena u politici – izazovi i prilike”**

**Sarajevo, 29. novembar 2016.**

"Poštovane dame i gospodo, učesnice i učesnici Tematske sjednice Komisije za ostvarivanje ravnopravnosti spolova Predstavničkog doma Parlamentarne skupštine Bosne i Hercegovine „Učešće žena u politici – izazovi i prilike”, u ime članica i članova Komisije, te partnera: Agencije za ravnopravnost spolova BiH i Misije OSCE-a, želim vam dobar dan i dobro došli.

Zadovoljstvo mi je što su sa nama predstavnici i predstavnice parlamentarnih komisija, gender institucija, Centralne izborne komisije BiH, međunarodnih organizacija i ambasada, te većeg broja nevladinih organizacija koje smatram našim partnerima na polju rodne ravnopravnosti.

Namjera nam je da danas predstavimo Rezoluciju Parlamentarne skupštine Vijeća Evrope o procjeni uticaja mjera za poboljšanje zastupljenosti žena u politici, usvojenu 21. aprila ove godine.

Komisija smatra rezoluciju važnim dokumentom koje zemlje članice ove međunarodne organizacije trebaju implementirati u svoje zakonodavstvo, kako bi se povećao broj žena u političkom životu i samim tim pojačao i njihov uticaj u zakonodavnoj i izvršnoj vlasti.

Ovaj dokument trebamo koristiti i kao argument u našim nastojanjima da kroz izmjenu zakonodavstva i kroz druge mjere ostvarimo napredak u ovoj oblasti.

Današnju sjednicu ćemo iskoristiti i da predstavimo Izvještaj o uspjehu kandidatkinja na lokalnim izborima 2016. godine, kako bismo konstatirali da li su mjere koje smo u posljednje četiri godine poduzimali donijele određeni napredak u zastupljenosti žena na lokalnom nivou vlasti.

Razloge zbog čega, i pored svih preduzetih aktivnosti, ne uspijevamo postići veći napredak u ravnopravnom učešću žena i muškaraca u političkom životu Bosne i Hercegovine i koji su višeznačni ne bih sada iznosio, pošto su puno puta istraženi i analizirani i više manje svi ih znamo.

Taj procenat se kreće oko 20%, zavisno od nivoa zakonodavne vlasti i, po pravilu opada kako idemo prema nižem nivou vlasti.

Za mene i ostale u Komisiji je najvažnije kako dalje i kako mi možemo u okviru svojih nadležnosti doprinijeti da se slika počne mijenjati.

Mogu vam reći da je ova komisija, kako u sadašnjem, tako i u predhodnim mandatima često imala na dnevnom redu ovo pitanje.

To smo činili razmatrajući implementaciju državnih strategija.

Tu prije svega mislim na Gender akcioni plan, Akcioni plan za provedbu Rezolucije UN-a: Žena, mir i sigurnost ali i provedbu preporuka UN komiteta za SIDOU.

Navedeni dokumenti predviđaju cijeli niz mjera i aktivnosti i brojne aktere, što bi u konačnici dovelo do značajnije parcipacije žena u političkom životu i približavanju željenom procentu od najmanje 40% , kako je to propisano Zakonom o ravnopravnosti spolova u BiH.

Kad je u pitanju harmonizacija zakona sa Zakonom o ravnopravnosti spolova u BiH, dakle naša nadležnost, naše je mišljenje da je neophodno donijeti novi zakon o političkim strankama kojim bi se stranke obavezale da u statutima utvrde načelo i mehanizme ravnopravne zastupljenosti spolova u stranačkim tijelima i na izbornim listama. Ova preporuka je upućena Vijeću ministara BiH ali za sada nije realizirana.

Nadalje, usklađivanje zakona na svim nivoima vlasti BiH sa Zakonom o ravnopravnosti spolova u BiH, te uspostava mehanizama za povećanje broja žena u zakonodavnoj i izvršnoj vlasti kroz izmjene izbornog i zakonodavstva kojim se regulira uspostava tijela izvršne vlasti je samo djelimično realizirana izmjenom Izbornog zakona BiH 2013. godine koji je obavezna kvota na izbornim listama povećana sa 33 na 40%.

Napominjem da je naša komisija u junu ove godine izradila i u parlamentarnu proceduru uputila prijedlog za izmjenu Izbornog zakona BiH kojim smo predložili paritet na izbornim listama za kandidatkinje i kandidate uz naizmjenično

navodjenje. Također smo u prijedlogu za izmjenu Zakona o Vijeću ministara BiH predložili odredbu prema kojoj bi u sastavu Vijeća ministara moralo biti zastupljeno najmanje 40 % oba spola.

Dakle iako smo ove prijedloge temeljili na odgovarajućim odredbama Zakona o ravnopravnosti spolova, naš prijedlog nije izglasan u Predstavničkom domu, čak je postojala opasnost da se ukine sadašnja odredba o obaveznom rasporedu kandidata na izbornim listama, što bi bio veliki korak unazad.

Želim vjerovati da ćemo do kraja našeg mandata prijedloge ovih zakona ponovo uputiti na usvajanje, ovaj put uspješno, a u prilog nam ide i Rezolucija Parlamentarne skupštine Vijeća Evrope o procjeni uticaja mjera za poboljšanje zastupljenosti žena u politici, koja od zemalja članica traži potpuni paritet u političkom predstavljanju.

Jedna od naših ranijih preporuka upućena je i Regulatornoj agenciji za komunikacije BiH o uređivanju i kontroli medijskog predstavljanja kandidata za vrijeme izbornih kampanja i Centralnoj izbornoj komisiji BiH da upozorava političke stranke na obaveze koje se odnose na ravnopravnu zastupljenost spolova prilikom izbora kandidata za Vijeće ministara BiH i to će biti predmet posebne analize.

I za kraj, moja ocjena je da, iako prema parametru političke participacije žena nismo na začelju, nikako ne možemo biti zadovoljni i trebamo uporno raditi na dosljednoj realizaciji mjera predviđenih u strateškim dokumentima, kako bi se slika počela mijenjati.

Vjerujem da ćemo na osnovu ovoga što sam iznio, te informacija koje ćemo čuti tokom sjednice i diskusije koja će uslijediti utvrditi prijedloge za koje ćemo se svi na svom polju rada zalagati, kako bismo postigli napredak koji nam je neophodan na putu realizacije principa pune ravnopravnosti spolova u Bosni i Hercegovini.

Hvala!"